

易

通

釋

易通釋叙目

循承祖父之學幼年好易憶乾隆丙申夏自塾中歸先  
子問曰所課若何循舉小畜彖辭且誦所聞於師之解  
先子曰然所謂密雲不雨自我西郊者何以復見於小  
過之六五童子宜有會心其思之也循於是反復其故  
不可得推之同人旅人之號咷蠱巽之先甲後甲先庚  
後庚明夷渙之用拯馬壯吉益憤塞鬱滯悒悒於胸腹  
中不能自釋聞有善說易者就而叩之無以應也乙巳  
丁憂輟舉子業乃徧求說易之書閱之於所疑皆無發  
明嘉慶九年甲子授徒家塾念先子之教越幾三十年

無以報命。不肖自棄之罪。曷以逃免。竊謂卦起於包犧。八卦成列。因而重之。命之以名。文王以其簡而不易明也。繫以彖辭。周公以其簡而不易明也。繫以爻辭。密雲庚甲。以爻辭釋彖辭也。笑號馬壯。爻辭自相釋也。然而猶不易明。我孔子韋編三絕而後贊焉。且不一贊而至於十贊者。佐也。引也。佐文王周公之辭。引而申之也。包犧之卦。參伍錯綜。文王周公之繫辭。亦參伍錯綜。故小畜蠱明夷之辭。互見於小過巽渙之辭也。文王周公之辭。以參伍錯綜繫之。孔子十翼。亦參伍錯綜贊之。所以明易之道者備矣。七十子歿道在孟子。孟子道性善稱

仁義惡楊墨之執一。斥儀衍之妾婦。皆所以闡明孔子之學。而脗合乎伏羲文王周公之旨。故孟子不明言易。而實深於易。其商瞿所受。杜田生所傳。散見於孟喜京房鄭康成荀爽虞翻之說。不絕如縷。惜乎漢魏諸儒不能推其所聞。以詳發聖人之蘊。各持其見。苗莠雜糅。坐令老莊異端之流出而爭之矣。循旣學洞淵九容之術。乃以數之比例求易之比例。向來所疑。漸能理解。初有所得。卽就正於高郵王君伯申。伯申以爲精銳鑿破混沌。用是憤勉。遂成通釋一書。丙寅以質歙縣汪君孝嬰。南城王君實齋。均蒙許可。然自以全易衡之。未敢信也。

丁卯春三月。遭寒疾。垂絕者七日。昏瞶無所知。惟雜卦傳一篇。往來胸中。旣甦。遂壹意於易。明年以訟事伺候對簿。改訂一度。己巳佐歸安姚先生秋農通州白先生小山修葺郡志。稍輟業。庚午又改訂一度。終有所格而未通。身苦善病。恐不克終竟其事。辛未春正月。誓於先聖先師。盡屏他務。專理此經。日坐一室。終夜不寐。又易稿者兩度。癸酉二月。自立一簿。以稽考其業。歷夏迄冬。庶有所就。訂爲二十卷。皆舉經傳中互相發明者。會而通之也。聖人之義精矣妙矣。後生末學。寧能洞澈其全。得一二端。以俟君子之引而申焉可矣。聖人旣以參伍

錯綜者示其端倪舍此而他求烏能合乎後之說易者  
或有取乎愚之說也嘉慶十八年十一月冬至前二日

卷一

元

亨

利

貞

卷二

悔

吝

吉凶

厲

无咎

卷三

易

交

當

應

乘承

通

往來至幾卷四剛柔大小新舊遠近內外



上下

進退

得喪存亡

生死

卷五

道

命

性情才

教

則法律

仁義禮信知

譽懼

功

權

民

君子小人

卷六

遇

告

食

求與見居所處允辨待遲

反 敵 方 類 羣 醜 願 試 卷七

包 容

繫牽引茹

維

發

顛室慎

塞

遂

養育字飾

親好愛

故事

施設

尸

克伐征

亢

密

雜文

定寧成安息

虞

戒

卷八

光

時 實 盈 寡 衆 獨 久 永 長 速 疾 遄 怠 緩 徐 慢 裕 樂 笑 喜 慶

憂恤號

卷九

疑或

害

匪

艱難

窮

終

亂

惡



災眚

潛伏隱藏

輕蔑誅滅

沕斯隍索沙干

素

卷十

握渥

獲穫

蕃藩幡

祥詳羊翔

祇  
羝

約  
酌  
豹  
論

狗  
拘

髮  
拔

膏  
高

弟  
娣  
梯  
涕

華  
萸

輪  
綸

寵  
龍

石  
碩  
颯

角 桷

頎 仇 九

宮 躬

紱 沛

起 杞

第 拂

攻 工

已 止 祀

顙 桑

立 泣

幹翰

祿鹿

爛蘭連漣

撝靡

暉揮

形荆

卷十一

初筮原筮

丈人丈夫

牝馬牝牛

虎變

虎視

虎尾

射雉

射隼

射鮒

由豫

由頤

甘節

甘臨

頻復

頻巽

冥豫

冥升

休復

休否

介福

介疾

敦復

敦臨

敦艮

鳴謙

鳴豫

鳴鶴

童蒙 童觀 童牛 童僕

天行 志行

矢得 矢得

日閑 日動

三就 三錫 三驅 三接 三褫

金矢 金鉉 金車 金夫 金柅

盈缶 鼓缶 用缶

簋貳 二簋

致一 一致

卷十二

成有渝 官有渝

无首吉 无首凶

咸其腓 艮其腓

解而拇 咸其拇

羸其角 羸其瓶

來兌凶 來復吉

終无尤 終无咎

得黃金 得金矢 得黃矢

艮其趾 賁其趾 壯于趾 壯于前趾

需于郊 同人于郊

同人于野 龍戰于野

否之匪人 比之匪人

困于酒食 需于酒食

田獲三品 田獲三狐

喪牛于易 喪羊于易

得其資斧 喪其資斧

我心不快 其心不快

自我致戎 自我致寇

三歲不興 三歲不得 三歲不覿 三歲不覿

三歲不孕



並受其福 實受其福 于食有福 受茲介福  
日中見斗 日中見沫 日中則昃 日中爲市  
同人先號咷而後笑 旅人先笑後號咷  
王用亨于西山 王用亨于岐山

卷十三

帝乙歸妹 帝乙歸妹

高宗伐鬼方 震用伐鬼方

用拯馬壯吉 用拯馬壯吉

密雲不雨自我西郊 密雲不雨自我西郊

先甲三日後甲三日 先庚三日後庚三日

醫无膚其行次且 醫无膚其行次且

拔茅茹以其彙征吉 拔茅茹以其彙貞吉亨

或益之十朋之龜弗克違元吉 或益之十朋之

龜弗克違永貞吉

西南得朋東北喪朋 蹇利西南不利東北 解

利西南

老夫得其女妻老婦得其士夫 夫征不復婦孕

不育 女承筐无實士刲羊无血

箕子之明夷 其子和之 得妾以其子

卷十四

利建侯 利建侯

月幾望 月幾望 月幾望

有他吉 有他吝 有他不燕

田有禽 田无禽 舊井无禽

取女吉 勿用取女 勿用取女

輿說輻 輿說輹 壯于大輿之輹

王假有廟 王假有廟 王假有家

富以其鄰 不富以其鄰 不富以其鄰

不出戶庭 不出門庭 獲明夷之心于出門庭

利用賓 不利賓

血去惕出 渙其血去惕出

艮其輔 咸其輔頰古

翰音登于天 初登于天

卷十五

七日來復 勿逐七日得 勿逐七日得 勿逐

自復

十年乃字 十年勿用 至于十年

大君有命 大君之宜 武人爲于大君

往不勝 莫之勝說 終莫之勝吉

利涉大川 用涉大川 不利涉大川 不可涉

大川

利武人之貞 利幽人之貞 武人爲于大君

幽人貞吉

小有言 小有言 主人有言 昏媾有言 有

言不信 聞言不信

致寇至 致寇至 匪寇昏媾 匪寇昏媾 匪

寇昏媾 利禦寇 不利爲寇利禦寇

不鼓缶而歌則大耋之嗟 出涕沱若戚嗟若吉

不節若則嗟若 萃如嗟如 齎咨涕洟无咎

一陰一陽 一朝一夕 日月運行一寒一暑

日往則月來月往則日來 寒往則暑來暑往  
則寒來

其義吉 其義凶 其義喪 其義焚 義无咎  
義无咎 義无咎 天地之大義也 天地之  
大義也

卷十六

章 薊 閏

邱 陵

邑 國 邦

電

冰

泥

塗

穴

窞

溝

瀆

淵

泉

壟

次

鼻

膺

賁

股

肱

身躬

孕

祖考

朋友

卷十七

馬

鴻楊

果

木

林莽



莧陸

蒺藜 叢棘

瓶甕

匕鬯

枕

盤帶 屨

衣裳

簪弋

結繩

獄刑

卷十八

乾 離爲乾卦 乾行也 噬乾肺 噬乾肉

坤

屯

蒙

以蒙大難

需 繻有衣袽 賁其須 歸妹以須 濡其首

濡其尾 若濡 賁如濡如

訟

師 利行師 利用行師 勿用師 用行師

大師克相遇

比 遇其妣

小畜 大畜 畜臣妾 畜牝牛 畜衆

履 履霜堅冰至 履錯然 跛能履眇能視

非禮弗履

泰

否 否臧凶 利出否 小人否

同人 上下交而其志同 二女同居其志不同

行天地睽而其事同男女睽而其志通君子以

同而異 二女同居其志不相得 柔得位乎

外而上同

大有 大有得

謙 謙於无陽

豫 君子以思患而豫防之

隨 執其隨 不拯其隨 隨風巽

蠱

臨

觀 觀頤 觀我朵頤 觀象也 觀於天文觀

於人文 貞觀

噬嗑 厥宗噬膚 朋盍簪

賁 賁豕之牙 渙奔其机

剝 孚于剝

復 反復道也 復自道 牽復 其來復吉

勿逐自復 復卽命 无往不復 城復于隍

夫征不復

无妄

頤 頤中有物

坎

離 疇離祉 飛鳥離之凶 非離羣也 猶未

離其類也 離羣醜也 渙者離也

卷十九

咸 咸臨 品物咸章 品物咸亨 萬國咸寧  
恒 利用恒 立心勿恒 貞疾恒不死 行有  
恒 進退无恒 以恒也

遯 遯世无悶 遯世无悶 豚魚

大壯 女壯 馬壯 壯于前趾 壯于頄 剝  
牀 巽在牀下 從或戕之

晉

明夷 匪夷所思 遇其夷主

家人 不家 无家 子克家 承家 蔀其家  
睽

蹇

解

損

益

天道虧盈而益謙

君子以裒多益寡

夬

夬履

藩決不羸

其君之袂不如其娣之

袂

良兌爲附決

震爲決躁

姤

后不省方

后以裁成天地之道輔相天地

之宜

萃

升

升其高陵

天險不可升也

困

困蒙

其義不困窮矣

其吉則困而反則

也

井

革

執之用黃牛之革

鼎耳革

乾道乃革

鼎

震

振恆

震用伐鬼方

振民

艮

漸

其所由來者漸矣

歸妹

帝乙歸妹

女歸

歸而逋

與人同者

物必歸焉

天造草昧

日中見沫

豐



旅 商旅不行

巽 上巽也 順以巽也 順以巽也 順以巽也

也

兌 用說桎梏 輿說輶 後說之弧 莫之勝

說

渙

節 失家節 中節 剛柔節 不知節 節飲

食

中孚 孚 有孚 匪孚 罔孚 斯孚

大過 小過 過旬 有過則改 赦過宥罪

天地以順動故日月不過

既濟 未濟 天道下濟而光明

卷二十

易有大極 與時偕極 失時極 不知極 六  
爻之動三極之道也

天地之數五十有五 大衍之數五十其用四十  
有九

跋

夫網緼構象垂策者犧苞符獻徵通靈者牙事旣當文  
辭且逮旦然而演命于孔道經備矣慨自荀虞嵌實輔  
嗣遁虛十翼不宗九家散出三名未析二氏交攻扇其  
流風幾同賸熄吾友焦君里堂駢臂其人折衷此道知  
蹟動之有見念枝屈之不辭取龍還震取馬歸乾公冰  
于剛雨通于正千目一綱六闢四達觀者駭爲變本作  
者志主復初庶幾下古之微言不襲憑虛之鑿度後有  
君子推而別之若是則彬彬矣歛汪萊作

里堂先生少與吾兄雲臺講求經學及六書九數百家

之言既無不周遊齊魯吳越閒一至京師與當世通人  
賢士相結納四十外歸臥北湖築雕菰樓藏書數千卷  
足不入城市而專力於易垂二十年易學三書成英煦  
齋家宰謂先生之學過於孫明復李泰伯手臨趙孟頫  
所書說卦五十六字遺之又集蘇長公句云手植數松  
今偃蓋夢吞三畫舊通靈以表先生之學姚秋農司農  
湯敦甫宗伯亨見時談次亦極推重此書勸公諸世先  
生因亨從遊最久命跋數語惜亨質魯未窺萬一而先  
生之德之學見稱於名卿者亦無庸及門贅一詞矣嘉  
慶己卯十月望受業儀徵阮亨謹識

先生刻雕菰樓易學成榮嘗任校字之役因請問易之義例先生曰伏羲之卦有畫無辭文王周公以辭指其畫之所之其辭一如解祿術者之用甲乙丙丁等字譜琴聲者之用勺匕卅品等字一望似不可解一一求之則三角之弧線弦切聲音之抑揚高下隨求而得學易者於所繫之辭求其比例引申則知六十四卦三百八十四爻所之之吉凶得失徒執所繫之辭牽合義理皆景響也且枝枝葉葉何得一以貫之又云算圖之甲乙丙丁皆借用而易辭則有借用亦有實指琴譜之勺匕卅品皆實指而易辭則有實指亦有借用不拘一例隨

在以爲引伸又如說四聲者不曰平上去入而曰天子  
聖哲天子聖哲四字自成文理實平上去入之假借易  
辭各自成文理而其實各指其所之榮以先生之言按  
之於易深歎奇確爲二千餘年所未發王侍郎以爲鑿  
破混沌阮宮保以爲聖人復起不易斯言良不誣也先  
生書成嘗以程伊川作易傳期七十其書乃出因亦以  
十年待之適英大冢宰手書令刻榮等亦勸早刻公世  
先生乃翻然曰聖人之學雖再閱三五十年亦奚敢云  
能盡且年來緣易學而悟得孟子之學撰孟子正義以  
與易學相發明可先以易學質諸世遂於戊寅之秋授

榮等讎校付梓先生於三書外尙有易話二卷易廣記三卷注易日記三卷易餘篇錄二十卷又王氏易補疏二卷與尙書毛詩禮記春秋左氏傳論語諸補疏相屬爲六經補疏共二十卷皆與易學並成近則旣輯孟子長編三十卷今秋又草創爲孟子正義三十卷見在討論修飾未以示人也又手編書義叢鈔四十卷以舊撰禹貢班志鄭注釋二卷附於末先生自壬戌歸臥北湖以經學自課除一出佐修府志餘皆閉門謝客所成經學之書百數十卷榮旣校刻易學因述所聞如此嘉慶己卯冬十一月日至受業裔榮謹識

易通釋卷一

雕菰樓易學之三

江都焦循學

元

循按易之言元者二十四卦

乾坤屯訟比履泰大有隨蠱臨復无妄大畜離睽損益萃升井革鼎渙

傳之釋元也一則曰大哉乾元萬物資始乃統天一則曰至哉坤元萬物資生乃順承天元之義爲始自乾六爻依其序推之初三五已定所動而行者二四上也乾二之坤五爲始乾四之坤初應之乾上之坤三亦應之乾爲天獨天不生必有以治而理之統者治也理也諸卦之生生始於乾二之之坤五故乾元



爲資始。坤六五文言傳云：黃中通理，明以中，字釋黃字。通者，自乾二旁通。理者，分理，謂統天也。乾二旁通分理而美在坤五之中，以是明元元之義明矣。坤六五之元，所以明乾元。乾二之坤五，坤成比，乾成同人。坎二之離五，坎成比，離成同人。坤六五黃裳元吉，離六二黃離元吉，二文相同。明以坎二之離五與乾二之坤五相比例。若坤元傳以至贊之而坤之亨，又以咸贊之明以乾元亨，則坤成屯，屯通於鼎。鼎二之五元吉爲至哉之坤元，而鼎成咸，坤成旣濟爲坤之元亨，卽爲坤之利貞。惟由坤成屯，由屯通鼎，所以爲資。

生承乾元而通鼎爲坤元所謂承天而時行也乾成  
同人猶大有成同人大有傳云應乎天而時行是以  
元亨應字贊亨天字贊二之五上乾爲天則元也坤  
成比而應乾之成同人卽應大有之成同人應之而  
比成屯卽應之而坤成屯成屯而時行則變通於鼎  
是爲原筮鼎二之五爲元上之屯三成旣濟爲貞故  
云原筮元永貞大有之元亨明乾元比之元永貞明  
坤元非變通於鼎無所爲永貞也巽二之震五震爲  
隨巽爲漸兌二之艮五兌爲隨艮爲漸漸通歸妹歸  
妹二之五亦爲隨隨通蠱蠱二之五亦爲漸隨之元

謂蠱二之五卽巽二之震五亦卽兌二之艮五亦卽歸妹二之五卽先甲先庚也蠱之元謂成蹇而變通於睽卽後甲後庚也隨元猶乾元蠱元猶坤元舉隨蠱兩卦之元而震巽兌艮之元不待言而自見矣凡六十四卦之生生皆從八卦而起而八卦之生生則從二五而起初四三上未行而二五先行乃謂之元由乾坤坎離震巽艮兌之元而有同人比隨漸之元因而有師大有蠱歸妹之元由同人比隨漸而初四三上從之爲家人屯革蹇則由元而亨初四三上不先二五皆不失爲元家人通解解二之五成萃屯通

鼎鼎二之五成遯革通蒙蒙二之五成觀蹇通睽睽  
二之五成无妄屯之元與鼎之元互明蒙之元見於  
革蹇之元見於无妄升家人解之元見於萃大畜或  
明言或互言之也八卦二五不行而初四先行則乾  
四之坤初乾成小畜坤成復震四之巽初震成復巽  
成小畜離四之坎初離成賁坎成節兌四之艮初兌  
成節艮成賁八卦二五不行而三上先行則乾上之  
坤三乾成夬坤成謙離上之坎三離成豐坎成井巽  
上之震三震成豐巽成井艮上之兌三艮成謙兌成  
夬八卦二五不行而初四三上先行則乾四之坤初

上又之坤三乾成需坤成明夷坎離震巽艮兌初四  
三上先行亦成需明夷此小畜復夬謙節賁豐井需  
明夷十卦不可爲元乃變而通之則小畜通於豫復  
通於姤夬通於剝謙通於履節通於旅賁通於困豐  
通於渙井通於噬嗑需通於晉明夷通於訟在小畜  
復節賁初四先二五不可爲元在豫姤旅困初四未  
行以小畜二之豫五成萃猶解二之五也以賁五之  
困二成萃亦解二之五也以復五之姤二成遯猶鼎  
二之五也以節二之旅五成遯亦鼎二之五也在夬  
謙豐井三上先二五不可爲元在剝履渙噬嗑三上

未行以夬二之剝五成觀猶蒙二之五也以豐五之  
渙二成觀亦蒙二之五也以謙五之履二成无妄猶  
睽二之五也以井二之噬嗑五成无妄亦睽二之五  
也在需明夷初四三上先二五不可爲元在晉訟初  
四三上未行以需二之晉五需成既濟晉成否以訟  
二之明夷五訟成否明夷成既濟否既濟相錯爲同  
人比則亦乾二之坤五坎二之離五也故小畜復夬  
謙節賁豐井需明夷不可爲元通於豫姤剝履旅困  
渙噬嗑晉訟仍不失爲元於何見之復初九不遠復  
无祗悔元吉乾四先之坤初成小畜復卽能改悔旁

通於姤惟姤四未之初卽先以二之復五是爲不遠而復不遠而復則元吉矣履上九視履考詳其旋元吉乾上之坤三成夬謙謙變通於履一轉移之間仍不失爲元所謂旋也旋卽變而通之也其旋二字與不遠復三字互相發明復之旋在初四故復之元吉明於初九履之不遠在三上故履之元吉明於上九此經文自示其例也離上之坎三成豐井井旋而通於噬嗑與謙履同井上九有孚元吉傳云元吉在上與履上九傳同明井之於噬嗑猶謙之於履經明以有孚二字與其旋二字互明謙與夬不孚旋於履則

孚而元吉。井與豐不孚。旋於噬嗑則孚而元吉。井猶謙也。履猶噬嗑也。彼以履明謙。此以井明噬嗑。易辭互明之例多如是。井旋於噬嗑。則豐旋於渙。乃渙之元吉。不明於六三。而稱於六四。有微義焉。井上六有孚元吉。已足明渙之孚於豐。履上九其旋元吉。亦足明豐之旋於渙。則渙之元。不必更贅於上九。故就初四言之。以示其例。豐旋於渙。而有孚矣。然必渙二先之豐。五乃爲元吉。若渙二不之豐。五豐四先之渙。初豐成明夷。明夷上三陰爲羣。則仍不得爲元也。故渙其羣。乃得元吉。二先之豐。五而後豐。四之渙。初豐成。



既濟渙散其羣而渙成益爲渙有邱反是而成明夷則不爲元而爲匪雖有所思而傷夷之矣故云匪夷所思以此爲諸卦之例蓋履二不之謙五而四之謙初謙成明夷履成中孚正豐四之渙初之比例在渙二先之豐五則其旋元吉矣在履四先之謙初亦匪夷所思矣以履與井互明以渙與履互明舉一隅而三可反也於是明夷不可爲元旁通於訟則元吉故訟九五直云訟元吉訟之元以二之明夷五也若二不先行而四之初則中孚也卽豐四之渙初也亦謙初之履四也上之三則大過也卽賁上之困三也亦

復三之姤上也。推之於晉。需二不之晉。五而晉上之。三則小過也。卽小畜上之豫三也。亦節三之旅上也。晉四之初則頤也。卽夬四之剝初也。亦井初之噬嗑四也。是又因渙之匪夷而可推者也。中孚小過大過頤皆不可元。以中孚通小過。以大過通頤。則亦元。中孚二之小過。五小過成咸。中孚成益。大過二之頤。五頤成益。大過成咸。大過小過之成咸。猶恆二之五成咸。頤中孚成益。猶損二之五成益。損爲未濟四之初。亦爲革四之蒙初。睽四之蹇初。不可元也。惟通於咸。則元。損彖云有孚元吉。與井上九辭同。損之孚於咸。

猶井之孚於噬嗑也。其義互見於睽九四睽四之蹇初成損猶豐四之渙初成中孚匪夷所思則睽孤孤而有孚於咸則遇元夫交孚睽與渙互明損之元則括小過中孚而言之矣。恆爲未濟三之上亦爲家人上之解三鼎上之屯三不可元也。惟通於益則元益初九云利用爲大作元吉无咎傳云下不厚事也五先行而後上之三爲上以厚下五未行而上先之三則爲下不厚下不厚者恆之三上先於二五也因下不厚而有事。事者變而通之也。爲大作猶云知大始恆上不厚下不可以知大始變通於益而恆二之五

乃爲元吉。元吉在初九者。有微義焉。恆之失在上。益之盈在初。以益上之不失。補恆上之失。則恆之元在益。以恆初之不盈。補益初之盈。則益之元又在恆。經以元吉繫於初九。以明恆初之未行。與復初九元吉義同傳以下不厚贊元吉。以明恆上之先行。互相發明。傳之贊經。造於微如此。九五云。有孚惠心。勿問元吉。家人上之。解三成恆。恆不與家人孚。改而孚益。否四之初成益。益不與泰孚。改而孚恆。惠者順也。心者恆二之五也。恆有心而後益上順之。爲元吉。益二五已正寂然不動。故勿問。問猶遺也。益二五不相問遺。而以順恆之。

心爲元吉也。未濟二先之五成否。與需二之晉五訟二之明夷五同。未濟二不之五而四上先之初三成泰。與八卦成需明夷同。泰不可元。泰通於否。則泰二之五爲元。九五帝乙歸妹以祉元吉。否六四疇離祉。兩祉字相貫。以祉乃得元吉。謂泰二之五有否上之三應之。非有否應之。則泰二之五終止道窮。故以兩祉字相貫。明其所以元也。試更以渙之匪夷。推諸師大有蠱歸妹。師二不之五而同人四之師初成。臨同人上之師三成升。大有二不之五而四之比初成大畜。上之比三成大壯。隨四之蠱初亦成大畜。蠱上之

隨三亦成升。歸妹四之漸初亦成臨。漸上之歸妹三亦成大壯。升臨大畜大壯不可爲元。升通於无妄。大畜通於萃。臨通於遯。大壯通於觀。則可元。升无妄臨。彖皆稱元。大畜初四先二五而行。與復同。復於初九。明元吉之義。大畜於六四。明元吉之義。一也。萃九五。萃有位。无咎。匪孚。元永貞。匪謂大畜。大畜孚於萃。則大畜二之五爲元。萃三之大畜上。爲永貞。大壯不言元。通於觀。而二之五成革。卽革通於蒙。而二之五成觀。於革稱元。大壯可不必稱也。升二之五爲蹇。睽二之五爲无妄。於无妄升。稱元。睽蹇可不必稱也。傳贊

臨云大亨以正天之道也贊无妄云大亨以正天之命也固以无妄之於升例臨之於遯而首揭之云无妄剛自外來睽外也明指睽二之五蹇通睽而二之五成无妄卽无妄通升而二之五爲蹇也傳於此特示以例而諸言元者可推而通矣其行本得乎元則元而益求其元其行或失乎元則變通以復其元易者聖人教人改過之書也故每一卦必推其有過無過又推其能改能變非謂某卦變自某卦某卦自某卦來也自荀虞有之卦之說唐宋以後遂以爲卦變各立一例左支右詘愈失聖人作易贊易之本意八

卦始於乾坤六十四卦生於八卦其行也以元亨利  
貞而括其要不過元而已反復探求覺易道如此易  
之元如此蓋合全易而條貫之而後知易之稱元者  
如此也

亨

循按彖稱亨者四十卦

乾坤屯蒙需小畜履泰同人大有謙隨蠱

升困革鼎震豐旅巽兌  
渙節小過既濟未濟

爻稱亨者三卦

否初六六二大畜上九節六四

文言傳云

元者善之長也亨者嘉之會也君子體仁足以長人  
嘉會足以合禮繫辭傳云聖人有以見天下之動而  
觀其會通以行其典禮繫辭焉以斷其吉凶是故謂



之爻典禮京房作等禮乾彖傳云大哉乾元萬物資  
始乃統天此贊元也雲行雨施品物流行大明終始  
六位時成此贊亨也坤傳云坤厚載物德合无疆含  
宏光大品物咸亨品卽等也物之有品卽禮之有等  
嘉會合禮卽觀其會通以行其典禮禮所以辨上下  
定尊卑乾二之坤五爲元乾四乾上視元之所在而  
次第會之二五尊貴四上卑賤卑從尊而不踰賤從  
貴而不僭是以合禮乾二之坤五四會之則坤成屯  
上會之則坤成蹇旣會而成屯則通於鼎旣會而成  
蹇則通於睽鼎成遯而屯三又會於鼎上睽成无妄

而蹇初又會於睽四。是會而通。又通而會也。雲行。謂  
坤成屯。雨施。謂坤成蹇。爻物依品等。以流而成形。故  
含宏光大。品物咸亨。明指出咸字。則坤之亨。在鼎之  
成咸。惟品。乃含而不盡。惟含。乃咸而爲亨。乾坤兩傳  
釋亨字之義。已極詳明。大有二之五。卽乾二之坤五  
之比例。傳云。大中而上下應之。大中。元也。上下應。亨  
也。申之云。應乎天而時行。是以元亨。二之五而上有  
乾天。四之比。初爲下應。上之比。三爲上應。皆應乎天。  
但上下不可一時齊應。上應成革。則通於蒙而下應  
於蒙之成觀。下應成家人。則通於解而上應於解之。

成萃是爲時行元亨之義莫明於此損二簋可用亨傳云二簋應有時亦以應贊亨應有時則亦不一時齊應損二之五而咸四之初應之此一簋也益通恆二之五而益上之三應之此又一簋也如是爲有時卽如是爲亨大有爲乾坤之比例亦爲坎離之比例損爲艮兌之比例亦爲震巽之比例故傳之贊元亨於此二卦最詳習坎有孚維心亨七字字字明析三畫之坎不可以有孚也重爲六畫乃有孚於離非有孚不可言亨旣孚矣必先以二之離五爲同人心心然後以三之離上維之離成革坎成蹇是爲有嘉折

首嘉會合禮是以亨也。坎言亨已明，離不必煩言，但申補之云：利貞亨。於利貞下，指出亨字。明利貞卽是亨。兌彖傳稱亨利貞，亨而後利貞，此亨之承元者也。利貞而後亨，此亨之承利者也。亨之承元者，成家人屯及蹇革亨之承利者，成旣濟咸及旣濟益乾之元亨。謂成家人屯蹇革與坎之亨同。坤傳稱咸亨，則指屯通鼎成咸卽離之利貞亨。震亨而申之以虩虩笑言，是指先成屯而後通鼎也。巽不必煩言，但稱小亨。小指震明巽之亨，卽震之亨。兌旣言亨利貞，故艮不必更言，但言艮其背，傳贊出止字。明旣亨成蹇革宜。

有所止而不行乃得利貞非元無以爲亨非亨無以爲元貞不必亨利貞則亨故言亨則元在其中言利則元亨在其中凡不言元直言亨不言元亨直言利此其例也亨之義經文每以辭自釋之蒙彖云蒙亨下釋云匪我求童蒙童蒙求我傳云志應也以應贊求上云以亨行時中也卽與大有互明大有上應成革革時行則下應於童蒙也小畜彖云小畜亨下自釋云密雲不雨自我西郊傳云柔得位而上下應之又云剛中而志行乃亨乾四之坤初成小畜復初四越二五先行若以小畜二之復五雖剛中而志不行

於初四上更之復三爲坎雨矣惟孚於豫則上下皆應而志行二之豫五剛中而上應之但成咸無坎不雨乃所以爲亨也履彖云履虎尾不咥人亨傳云說而應乎乾亦以應贊亨乾上之坤三成謙夬三上越二五先行若以夬二之謙五三上不復能應是虎尾咥人也惟謙通於履謙雖虎尾而有以履之上下皆有應乃能辨上下定民志而制禮爲亨也同人彖云同人于野亨傳云柔得位得中而應乎乾又云中正在應野謂師上坤旁通於師乃得亨也謙彖云謙亨自釋之云君子有終此與履互明履二先之謙五爲

君子因而履四之謙初應之謙成既濟爲有終也。蠱  
彖云蠱元亨自釋之云利涉大川先甲三日後甲三  
日傳云元亨而天下治也。凡稱治則成既濟此元亨  
則天下治謂其先成蹇蹇通睽而成既濟成蹇先甲  
三日也。通睽成既濟後甲三日也。甲元也。三日亨也。  
後甲三日則利貞亨者也。噬嗑彖云噬嗑亨釋之云  
利用獄離上之坎三成豐井三上先行而不應則獄  
不可用所謂寘于叢棘三歲不得也。惟井孚於噬嗑  
井二之噬嗑五噬嗑三上應之以利而仍用獄故傳  
云噬嗑而亨。明井與豐不亨得噬嗑而亨也。賁彖云

賁亨釋云小利有攸往兌四之艮初成節賁賁之於節猶小畜之於復惟賁孚於困困二之賁五賁上之困三應之賁小孚於困則利有攸往傳贊云柔來而文剛故亨分剛上而文柔故小利有攸往經文以利釋亨傳互贊之謂困得賁而亨賁得困而利也復彖云復亨自釋云出入无疾朋来无咎小畜復无疾者也復孚於姤姤二出之復五而後四之初應之雖亦无疾乃以朋來而得无咎此復所以亨也大過彖云棟撓利有攸往亨傳云利有攸往乃亨姤上之復三爲棟撓不可爲亨惟利而孚於頤二先之頤五而後



四之初猶姤二先之復五而後姤四之初也咸彖云咸亨下自釋云利貞取女吉咸通損損二之五而四之初應之是亨卽是利貞取女謂四之初爲利貞則取女吉而亨也恆彖云恆亨下釋云无咎利貞利有攸往義與咸同惟咸本无咎恆爲家人上之解三則本有咎故通益而亨則无咎也遯彖云遯亨下釋云小利貞傳云遯亨遯而亨也剛當位而應與時行也小利貞浸而長也浸而長卽臨之剛浸而長臨之小與賁之小同臨通遯遯應臨而臨成旣濟故遯之亨卽臨之利貞也升彖云升元亨釋云用見大人勿恤

南征吉傳云剛中而應是以大亨剛中謂二之五應則无妄上之三爲南征也萃彖云萃亨下釋云王假有廟利見大人亨與大畜孚則假廟利見所以亨也困彖云困亨下釋云貞大人吉无咎傳云困而不失其所亨與賁互明賁成旣濟則貞困二先之賁五爲大人則不失其所賁小故不失其所則爲大人猶升小故用則見大人爲大亨也豐彖云豐亨下釋云王假之渙彖云渙亨下釋云王假有廟豐孚渙而亨渙亦孚豐而亨互見之矣旅彖云旅小亨下云旅貞吉節彖云節亨下云苦節不可貞苦窮也與賁係則窮

與旅孚則亨。賁與旅同一小也。旅小亨。賁小則不亨也。旅貞吉。賁貞則苦。故不可貞也。亦互明之。其或言亨。或不言亨。或與元並言。或與利並言。彼此互見。故屯鼎言亨。則家人解不必言。革蒙言亨。則蹇睽不必言。然无妄足以見睽。升足以見蹇。臨足以見解。大畜言利貞。而爻於上九補言亨。足以見家人小過言亨利貞。而詳其不宜上宜下。中孚之豚魚。卽發明小過之亨。蠱已言元亨。則漸申言其利貞。隨已言元亨利貞。而申之以无咎。則歸妹反言其无攸利。大過旣言亨。由於利。則頤但言貞吉。需旣言有孚。光亨貞吉。則

晉但以辭釋之不必明言亨所云康侯用錫馬蕃庶  
晝日三接卽發明有孚光亨也蓋不特本卦自釋而  
或互釋於旁通之卦或互釋於比例之卦凡此皆可  
類推既濟彖云既濟亨下釋云小利貞與遯同遯之  
小利貞指臨既濟之小利貞指未濟未濟彖云未濟  
亨卽既濟亨既濟釋之云初吉終亂初吉則亨未濟  
釋之云小狐汔濟濡其尾无攸利則反初吉而言其  
不亨小狐不汔濟尾不濡而初吉矣不能利貞而終  
亂仍不能亨既濟未濟兩彖相閒言之而傳於初吉  
贊云柔得中於未濟亨亦贊云柔得中知初吉是亨

亦知諸卦之亨皆由於柔得中也。否彖不言亨而初六言吉亨。所以明泰彖之吉亨。泰二之五以否四之初爲亨。否四之初亦應泰二之五而亨。拔茅。否初之四也。而應乎泰之五。泰五本小人得孚於否。則包承而吉。泰既孚於否。則二之五爲大人。否初三有所應。初六之亨。亨在泰。六二之亨。亨在否。故云否亨。明泰得否而泰亨。否得泰而否亨也。於否。明初四應二五爲亨。於大畜節。明三上應二五爲亨。離四之坎初成賁。節成既濟而安。賁亦成既濟而安。不可得而亨。惟通於旅。旅四不之初。則節成既濟。旅成咸。安在節。

而不在旅。故云安節亨。所以申明苦節不可貞。與旅貞吉之義也。大有四之比。初成大畜屯。大畜二之五。而上之屯三。成兩既濟矣。惟通於萃。則大畜成既濟。萃成咸爲何天之衢。彖云利貞上九以亨明之。而彖傳贊之云利涉大川。應乎天也。應乎天。卽何天之衢也。卽所謂利貞亨也。彖言亨已詳。故爻僅於此三卦發明之。其困九二。升六四。益六二。隨上六。大有九三。借享祀以明亨。萃彖傳亦云致孝享也。詳見後。

利

循按元亨貞之間。必合利以成四德。彖傳以萬物資

始爲元品物流形爲亨乾道變化爲利各正性命爲  
貞文言傳云利者義之和也利物足以和義又云利  
貞者性情也乾始能以美利利天下不言所利大矣  
哉繫辭傳贊利字最詳旣云變而通之以盡利又云  
變動以利言旣云往者屈也來者信也屈信相感而  
利生焉又云情僞相感而利害生於益云益以興利  
於解上六云君子藏器於身待時而動何不利之有  
凡三引自天祐之吉无不利而揭其要云通其變使  
民不倦神而化之使民宜之易窮則變變則通通則  
久元亨則乾成家人坤成屯家人上之屯三則窮故

藏而不動變通於解解二之五而後家人上之解三  
所謂待時而動也元亨成蹇革通蒙蹇通睽利貞  
而革蹇成既濟睽蒙成益故益以興利義者宜也解  
失道成臨變而通於遯則大君之宜是所爲使民宜  
之也能變通則夫子制義不能變通則從婦而終履  
失道成中孚豫失道成小過兩相通則其子和之是  
所謂義之和也和也者天下之達道也仁者安仁知  
者利仁成己仁也成物知也利仁乃爲知利天下乃  
爲成物蓋貞僅能成己必利而及物然後各正性命  
保合太和由始而終元亨貞也不俟終舍而有始變



而通之以盡利也。乾六爻不言元亨，九二九五兩言利，見大人九二謂坤成屯，屯變通於鼎，九五謂乾成家人，變通於解，屯家人盈不可久，以變通而可久，是之謂利。有元而利者，乾二之坤五成比未成屯，卽變通於大有，所謂自天祐之吉无不利也。此不俟亨而卽利者，旣亨成屯若不變通以盡利，則終止未利不可貞也。乾四德平舉，坤彖平舉元亨於利貞，特加牝馬二字，且申之云：君子有攸往，先迷後得主，利牝馬之馬，卽睽所喪之馬，利牝馬之貞，卽用六利永貞得主則利，不得主則迷，利則永貞，卽變則通通則久也。

乾坤後屯隨无妄臨革五卦彖辭皆平列四德屯則申之云勿用有攸往利建侯臨則申之云至于八月有凶无妄則申之云其匪正有眚不利有攸往屯傳先言大亨貞以贊元亨貞別言宜建侯而不寧以宜字贊利字以不寧贊勿用有攸往不以屯三往家人上故不寧而以鼎二之五爲宜是爲利建侯彖辭勿用有攸往利建侯八字乃恐利字之義不明而申明之故傳不以利與大亨貞並言而別詳利字之義於後大亨貞謂由坤而屯而旣濟利則謂屯通於鼎也革元亨利貞承己日乃孚傳云大亨以正革而當其

悔乃亡革而當三字贊利字革者改也改而從蒙蒙  
二之五而後革四之蒙初則革而當大亨以正謂乾  
而革而既濟利則謂革通於蒙革而當也當亦宜也  
乾成革猶成家人坤成屯猶成蹇舉一革而家人之  
通解可知舉一屯而蹇之通睽可知然无妄成於睽  
臨成於解无妄之元亨利貞卽明蹇之通睽臨之元  
亨利貞卽明家人之通解解二不之五而四之初不  
可爲利變通於遯而元亨利貞此由失道而利者也  
失道而能變通其利與不失道同若不變通而解旣  
成臨矣不通遯而卽以二之五是爲至于八月有凶

傳先以大亨以正天之道也。贊元亨利貞，別以消不久三字。贊至于八月有凶，不久者，不能窮則變，變則通也。不能窮則變，變則通，是不能神而化之，使民宜之也。是不利也。解失道成臨，蒙失道成升，鼎當位成遯，睽當位成无妄，无妄旁通於升，猶遯旁通於臨，舉一臨以見遯，卽以見家人，解與屯鼎舉一无妄以見升，卽以見蹇，睽與革蒙參伍錯綜，而按之井然如繪，經之微妙如此。无妄於元亨利貞之下，反言以明之云：其匪正有眚，不利有攸往。明指出不利二字。傳以大亨以正天之命也。贊元亨利貞與臨傳同，別以无妄之

往何之矣。贊不利有攸往。升二不之五而无妄四之  
升初三又往上。成既濟是爲匪。升方爲匪。无妄成既  
濟而貞雖正而有眚。是貞必本於利也。隨稱元亨利  
貞何也。傳云。剛來而下柔。大亨貞无咎。而天下隨時  
隨之所以无咎者。以其利也。故不云大亨利貞。而云  
大亨貞无咎。謂元亨利貞所以无咎者。以其天下隨時  
惟隨時則利。故云隨時之義。隨時之義卽隨時之利  
也。震巽艮兌之元爲隨漸。猶乾坤坎離之元爲比同  
人。舉一隨以明巽震艮兌之元亨利貞。故傳首揭剛  
來二字。謂巽二來之震五亦兌二來之艮五也。易稱

利有攸往者十二。復恒大過損益夫萃巽賁小畜九三損上九无妄六三稱不利有攸

往者二。剝稱利涉大川者九。需同人蠱大畜益渙中孚頤上九未濟六三稱不利

涉大川者一。訟稱利見大人者七。訟蹇萃巽乾九二九五蹇上六稱无不

利者十三。坤六二屯六四大上有上九謙六四六五臨九二剝六五大過九二遯上九晉六五解上六鼎上九巽九五稱无攸

利者十。歸妹未濟蒙六三臨六三无妄上九頤六三恒初六大壯上六萃六三歸妹上六於不利有攸往

知利有攸往之所以利於不利涉大川知利涉大川

之所以利於无攸利知无不利之所以利无攸利見

於歸妹未濟兩象歸妹征凶无攸利征謂三之漸上

也二未之五則成大壯上六爻辭發明之女承筐漸

初之歸妹四也士刲羊漸上之歸妹三也无實无血

歸妹二未之五也。則歸妹成泰。漸終而歸妹無以爲始。是不能和義。故无攸利。遯上之臨三。臨二未之五。臨亦成泰。此甘臨所以无攸利。臨卽歸妹四之漸初也。大壯羝羊觸藩不能退不能遂。謂不成革而成泰。故无攸利。臨大壯之无攸利。皆發明歸妹之无攸利。恆四之初二未之五。恆成泰。此浚恆所以无攸利。卽未濟二不之五而上之三。四又之初也。未濟上之三成。恆四之初則成損。損上又之三成。泰。此小狐汔濟濡其尾之无攸利。與浚恆互相發明。革四之蒙初。蒙上又之三。二未之五。蒙成泰。此見金夫所以无攸利。

革四之蒙初成損卽未濟四之初之比例未濟彖之  
无攸利本指先成損損上之三因先成恆恆四之初  
亦无攸利故於恆初六補言之而先成損者未明也  
故發明於蒙六三不明於損六三而明於蒙六三者  
經文之錯綜變化每如是也歸妹之於漸猶蠱之於  
隨隨蠱相錯爲大過頤頤六三十年勿用无攸利謂  
頤上之三卽蠱上之隨三猶漸上之歸妹三也蠱上  
之隨三隨成革蠱成升隨四之蠱初隨成屯蠱成大  
畜於是萃六四稱萃如嗟如无攸利无妄上九稱无  
妄行有眚无攸利无妄與升通者也萃與大畜通者



也萃四之初爲隨四之蠱初之比例亦大過四之初之比例无妄上之三爲蠱上之隨三之比例亦頤上之三之比例乃萃如嗟如謂大畜上之萃三成泰无妄行有眚謂无妄四之升初成泰无妄成益益上又之三卽歸妹成臨三又之漸上也萃成咸咸四又之初卽歸妹成大壯四又之漸初也諸无攸利皆指成泰而頤六三獨指成明夷此經文特示以例欲讀者知推而廣之而无妄升又相錯爲復姤萃大畜又相錯爲夬剝則大畜上之萃三爲剝上之三无妄四之升初爲姤四之初皆可引申觸類者也蓋變通爲利

雖變通而不能當位仍不得爲利故云无攸利大畜  
上之萃三同於剝上之三三是剝上之三无攸利夬二  
之剝五而後剝上之三則貫魚以宮人寵无不利大  
過二不之頤五而頤上之三无攸利頤五之大過二  
則老夫得女妻无不利臨二不之五遯上之臨三則  
无攸利臨二之五而後遯上之臨三在臨則咸臨无  
不利在遯則肥遯无不利解成臨猶歸妹成臨无攸  
利解二之五而後家人上之解三則射隼高墉獲之  
无不利鼎成大畜猶蠱成大畜无攸利鼎二之五而  
後上之屯三則玉鉉大吉无不利鼎成泰猶歸妹成

泰屯之乘馬是也。乘馬則无攸利。泰通於否則求昏媾。往吉无不利。未濟成泰无攸利。需二之晉五成否。矢得勿恤无不利。卽未濟二先之五也。歸妹成泰无攸利。巽二之震五成隨而後上之震三。震成革。卽歸妹成革也。巽成蹇。卽漸成蹇也。又變而通之。令革通蒙蹇。通睽則貞吉悔亡无不利。巽二之震五卽歸妹二之五也。无妄成益。上又之三則无攸利。謙之通履。猶升之通无妄。履成益。變通於恆則利用侵伐无不利。六四无不利。撝謙謂所以无不利者。以其撝謙也。因撝謙乃利用侵伐。故无不利。履二之謙五而後四。

之謙初殊乎升二不之五而无妄四卽之升初履成  
益通於恆殊乎无妄成益又不變通於恆卽以上之  
三爲匪正有眚也坤六二直方大不習无不利坤二  
五本習二五先行則不習小畜復夬謙皆習也乾二  
先之坤五爲敬以直內內家人也亦蹇也蹇旁通於  
睽爲義以方外外睽也亦解也屯家人蹇革皆不習  
者也无不利有二義其一謂變通而又變通如敬以  
直內又義以方外巽九五貞吉悔亡剝六五貫魚以  
宮人寵是也其一失道又失道而一旦能變通如困  
窮至於成明夷需需一通晉則矢得勿恤艱恤至成

貞

既濟泰泰一通否則求昏媾是也總之能變通則无不利不能變通無論得失存亡皆歸於不利而已矣

循按貞者正也乃有貞吉矣又有貞凶貞吝貞厲有

可貞矣又有不可貞經稱貞吉二十四需象需九五比六二履九二否初六謙六

二豫六二隨初九臨初九頤象咸九四大壯九二九四遯九五晉初六家人六二解九二損上九姤初六旅象巽九五未濟九二九四九五安貞

吉二坤象訟永貞吉二費九三居貞吉二頤六五貞丈人吉

貞大人吉各一國象師象稱貞凶九師六五隨九四頤六三恆初六巽上九節上六中孚上九剝初六六二

屯九五恆六五一云小貞吉大貞凶一云貞婦人吉

夫子凶小大皆指五屯其膏謂不以屯三之家人上

所以然者小貞吉大貞凶也小指鼎大指家人屯旁  
通於鼎則貞吉不旁通於鼎而以屯三之家人上則  
凶小則貞吉大則貞凶所以屯其膏也恆其德謂恆  
二之五也貞謂成既濟也益通恆恆小益大恆爲婦  
人恆以婦孚益則二之五而初四從之成既濟可也  
恆已成咸宜通於損損小咸大咸爲夫子若不俟損  
二之五而咸四之初成既濟是以夫從婦所以凶也  
蓋鼎五小方其與屯旁通二雖之五仍稱小必已成  
遯與臨旁通乃爲大恆五小爲婦人方其與益旁通  
二雖之五仍是婦人必已成咸與損旁通乃爲夫子

大小夫婦之稱以旁通而定易之例也恒初六浚恒  
貞凶浚謂四之初成泰益通恒恒二之五而益上之  
三此可貞也恒先成泰則泰二之五而益上之三此  
不可貞也故貞則凶矣經之言貞必連於利利而貞  
則吉不利而貞則凶耳

屯蒙隨臨无妄大畜恒離大壯損萃小過  
中孚渙兌漸革皆稱利貞坤用六利永貞

家人象觀六二利女貞屯初九利居貞明夷象大畜九三噬嗑九四利艱貞問  
人利君子貞坤利牝馬之貞歸妹九二利幽人之貞巽初六利武人之貞升上  
六利于不息之貞  
遯既濟小利貞泰二之五與否相錯爲同人比否之匪

人則不利君子貞同人于野則利君子貞否之匪人  
謂泰二不之五比之匪人謂大有二不之五泰二不  
之五則否不可貞師二之五則同人可貞於比稱比

之匪人於同人稱利君子貞而於否合明之云否之  
匪人不利君子貞互相比例其義可見屯六二女子  
貞不字謂鼎四之初成大畜大畜二之五成家人而  
家人上之屯三成兩既濟故不字不令上之屯三  
而變通於解解二之五而後家人上之解三鼎之成  
家人者雖成既濟而貞而解成咸不成既濟是爲閑  
有家向之女子貞不利者是則利女貞女貞卽女子  
貞蓋家人上不可貞於屯三而可貞於萃三解二之五成萃貞  
於屯三則不字貞於萃三則利利則字矣字則利矣  
觀六二亦利女貞何也謂大壯二之五也解二之五



爲萃大壯二之五爲革革觀相錯卽爲家人萃故以  
相比例明家人之利女貞謂通於解而成萃也漸女  
歸吉利貞與利女貞互明漸上之歸妹三歸妹成大  
壯漸成蹇大壯通觀則利女貞蹇通睽則女歸吉推  
之歸妹四之漸初漸成家人歸妹成臨在家人通解  
爲利女貞在臨通遯亦女歸吉何也蹇通睽睽成无  
妄无妄蹇相錯爲屯遯卽爲臨通遯而二之五也遯  
卽鼎二之五鼎成遯卽通於臨則女子利而後貞非  
貞而不字矣家人觀兩言利女貞與屯之女子貞不  
字互明亦與漸女歸吉利貞互明如此師六五長子

帥師弟子輿尸貞凶傳云長子帥師以中行也弟子  
輿尸使不當也長子帥師則成屯田有禽利執言則  
通於鼎鼎成咸爲小貞吉矣弟子輿尸則師成升而  
升成蹇時同人已成革不變通而革四之蹇初則貞  
凶矣蓋同人上不之師三則不輿尸不輿尸而二之  
五而初四從之成屯故田有禽而長子帥師同人上  
既先之師三則輿尸輿尸而後二之五而初四從之  
則不成屯而成兩既濟故爲使不當也不當者二不  
先之五也二先之五則爲丈人如是貞則吉故云師  
貞丈人吉六五弟子輿尸貞凶反言以明彖也革四

之蹇初貞凶矣。革通蒙則貞吉。蒙革相錯爲困。賁困  
彖云。困亨貞大人吉。亨則困成。咸貞則賁成。旣濟貞  
大人吉。謂賁五先大而後貞也。比六二六四皆言貞  
吉。六二比之自內貞吉。內家人也。謂比成屯大有成  
家人自家人通解而貞爲吉。六四外比之貞吉。外睽  
也。謂比成蹇大有成。革蹇通睽而貞爲吉。晉成否則  
需貞吉。履成益則謙貞吉。豫成咸則小畜貞吉。觀成  
益則大壯貞吉。遯成咸則臨貞吉。解成咸則家人貞  
吉。姤成咸則復貞吉。未濟九四貞吉。下申云。震用發  
鬼方。則謂未濟成益而通於恆六五貞吉。下申云。君

子之光有孚吉。光卽需有孚。光亨之光。謂二之五成否。未濟之孚於旣濟。猶晉之孚於需。未濟成否。而旣濟之貞乃吉。故云有孚吉。明未濟與旣濟有孚而吉也。否與泰孚。否成益。泰成旣濟。卽否初六拔茅茹以其彙之貞吉也。巽九五貞吉。下申云。无初有終。謂成蹇而通於睽。睽成益。蹇成旣濟。解九二貞吉。承田獲三狐。得黃矢而言解。成咸。家人成旣濟也。隨初九官有渝。貞吉。下申云。出門交有功。謂蠱成蹇。隨成革。革通於蒙。是爲官有渝。渝而貞則吉也。損上九弗損益之无咎。貞吉。弗損未成損之先。尙爲蒙也。益之蒙成。

益也。革四之蒙初成，損而後損二之五成益，則損而益之。蒙二先之五，而後革四之蒙初成益，則爲弗損益之。蒙不由損成益，則革之貞乃吉也。隨成革而通蒙，則貞吉。不變通而蹇初之革四所獲在隨，成兩旣濟，官而不渝，故爲貞凶。巽成蹇而通睽，則貞吉。不變通而喪其資斧，則巽成需，震成明夷，以需二之明夷五成兩旣濟，故貞凶。傳云：喪其資斧，正乎凶也。當喪其資斧之時，急宜變通改悔，不可貞矣。而猶貞乎，則凶也。正乎二字一頓，上第言喪，未言貞，貞字上原有不可貞一層。貞凶二字，乃是作一轉語，傳以正乎二

字贊之其經文之停頓轉折傳神而出是傳之贊經  
曲折摹寫如此節上六苦節貞凶苦節則節成需賁  
成明夷彖以爲不可貞者也不可貞而竟貞此貞凶  
與巽在牀下同中孚上九翰音登于天貞凶與頤六  
三拂頤貞凶同拂頤者大過二之頤五而大過四之  
初以輔之也斯時大過成旣濟頤成益益不通恆而  
上之三成旣濟故貞凶也音卽飛鳥遺之音之音中  
孚二之小過五而小過四之初以比之也斯時小過  
成旣濟中孚成益幹此音必以旣濟通未濟爲登于  
天旣濟通未濟則益通恆不變通而益上之三故貞

凶也。剝初六六二皆云蔑貞凶。謂夬成需剝成明夷。需二之明夷五也。先以夬四之剝初爲足。又以剝上之三成明夷爲剝牀。當此剝牀之時。尙可辨明。不辨則由蔑而貞凶矣。无妄九四可貞无咎。傳云固有之也。无妄成益。變通於恆。爲德之固。乃可貞。坤六三含章可貞。或從王事。无成有終。從王事。謂從鼎。自我而終。卽自我而止。則爲成自我而終。不自我而止。是爲无成。无成有終。乃可貞也。益六三用凶事。无咎。傳云固有之也。用凶事。謂上之三用征伐之事也。蓋上之三終矣。得无咎者。變通於恆。爲德之固也。固有之則

可貞所謂貞固足以幹事也。蠱上之隨三隨成革蠱成升與同人上之師三同不出門而無功者也。升通於无妄則幹母之蠱所以幹母之蠱者以其不可貞也不能幹母之蠱則弟子興尸矣而貞凶矣此其互相發明之有跡可尋者也。其安貞艱貞永貞居貞疾貞詳見後。



男廷琥孫

授書授詩

校字